

आकाशवाणी जयपुर-अजमेर
प्रादेशिक समाचार
दिनांक 31.08.2024 समय: 18.45 बजे

- प्रधानमंत्री नरेंद्र मोदी कह्यो-महिलावां रे खिलाफ अत्याचार रा मामलां मांय करड़ा कानून अर तुरत फैसलां री जरूरत।
- प्रधानमंत्री वीडियो कॉन्फ्रेंस रे मार्फत तीन और वंदे भारत एक्सप्रेस रेलगाडियां ने हरी झंडी बता र रवाना कीनी।
- कैबिनेट मंत्री डॉक्टर किरोड़ी लाल मीणा कह्यो-राज्य मांय घणी बिरखा रे कारण साखां ने व्ह्या नुकसाण री भरपाई करी जावेला।
- प्रदेश मांय बिरखा रो सिलसिलो ओजू सरू व्ह्यो-काल ऊं बिरखा मांय बधोतरी रा आसार

000

प्रधानमंत्री नरेन्द्र मोदी कह्यो है के महिलावां रे खिलाफ अत्याचार अर बच्चां री हिफाजत मांय कोताही समाज सारू घणी चिंता रा मुद्दा है। वे आज नई दिल्ली मांय जिला न्यायपालिका रा दो दिन रा राष्ट्रीय सम्मेलन रा उद्घाटन रे मौके बोल रह्या हा। प्रधानमंत्री कह्यो के महिलावां रे खिलाफ अत्याचार ऊं जुड्या मामलां मांय बेगा फैसला लेवण ऊं महिलावां री हिफाजत तैय व्हे सकेला।

.....

भारतीय न्याय संहिता रा बारा मांय प्रधानमंत्री कह्यो के नागरिक प्रथम, प्रतिष्ठा प्रथम अर न्याय प्रथम ई री भावना है। वे कह्यो के देश मांय न्यायिक ढांचा रा विकास सारू करीब आठ हजार करोड़ रूप्या खर्च करी ज्या है। ई मौके प्रधानमंत्री एक डाक टिकट अर सुप्रीम कोर्ट खुलण रा 75 साल पूरा व्हेवण रा बारा मांय एक सिक्को ई जारी कीनो। कार्यक्रम मांय सुप्रीम कोर्ट रा मुख्य न्यायाधीश न्यायमूर्ति डी. वाई. चंद्रचूड़ कह्यो के ओ सम्मेलन अखिल भारतीय जिला न्यायाधीश सम्मेलन री आगली कड़ी है।

ई मौके केंद्रीय कानून अर न्याय मंत्री अर्जुन राम मेघवाल कह्यो के देश मांय न्याय री प्रक्रिया ने नुवी बणायी जा रही है।

.....

प्रधानमंत्री नरेन्द्र मोदी आज वीडियो कॉन्फ्रेंस रे मार्फत तीन वंदे भारत रेलगाडियां ने हरी झंडी बता र रवाना कीनी। अ गाडियां मेरठ-लखनऊ, मदुरै-बेंगलुरु अर चेन्नई-नागरकोइल बीचे चलायी जा रही है। ई मौके प्रधानमंत्री कह्यो के वंदेभारत रेलगाडियां रा नेटवर्क मांय बधोतरी ऊं देश विकसित भारत रा लक्ष्य ओड़ी बध रह्यो है। वे कह्यो के नान्हा टेशनां ने ई हवाई अड्डां री भांत विकसित कर्या जा रह्या है।

000

गृह राज्यमंत्री जवाहर सिंह बेढ़म आज राजभवन मांय राज्यपाल हरिभाऊ किसनराव बागडे सागे मुलाकात कीनी। वे ई दौरान राज्यपाल ने राम मंदिर अर भगवान राम री फोटो भेंट कीनी। राज्यपाल सांगे वां री आ शिष्टाचार मुलाकात ई।

0000

संपूर्णता अभियान रा तैत कोटपूतली-बहरोड जिला रा आशान्वित ब्लॉक नीमराणा मांय कर्या जा रह्या कामां री जिला कलेक्टर कल्पना अग्रवाल जाणकारी दीनी। वे बतायो के ई अभियान रा तैत शिक्षा, स्वास्थ्य अर महिला बाल विकास समेत छह बिन्दुआं माथे काम कर्यो जा रह्यो है।

.....

राज्य मांय 21 वीं पशुगणना सारू आज झालावाड रा झालरापाटन मांय पंजाब नेशनल बैंक कृषक प्रशिक्षण केन्द्र मांय एक दिन रो सिखावण शिविर लगायी ज्यो, जिण मांय ज़िला रा 116 प्रगणक अर 23 सुपरवाईजर सिरकत कीनी। ई मौके ज़िला प्रमुख प्रेम बाई दांगी कह्यो के ढांढां री गिणती रो काम घणो खास है अर सही पशुगणना करी जावणी जरूरी है। इण ऊं पशुपालन ऊं जुड़ी योजनावां लागू करण मांय फायदो मिले है। पशुपालन विभाग रा संयुक्त निदेशक डॉ. टी. ए. बन्सोड जनता रा नुमाइन्दा ऊं ई पशुगणना मांय मदद करण री अरज कीनी।

000

गृह राज्य मंत्री जवाहर सिंह बेढम अर कैबिनेट मंत्री किरोड़ी लाल मीणा आज दौसा रो दौरो कीनो। वे एक अस्पताल रा उद्घाटन जळसा मांय सिरकत कीनी। ई पाछे खबरनवीसां सागे बातचीत करता थकां बेढम कह्यो के राज्य री मौजूदा सरकार अपराधां माथे लगाम लगावण सारू लगातार काम कर रही है। वे कह्यो के प्रदेश री जेलां मांय ई सुधार कर र व्यवस्था चाक-चौबंद करण री कोशिश करी जा रही है। गृह राज्य मंत्री राज्य रा पैली वाळा मुख्यमंत्री अशोक गहलोत माथे एक सोशल मीडिया हैण्डल माथे भरमावण वाळी बेबुनियाद पोस्ट अपलोड करण रो आरोप माण्ड्यो। कैबिनेट मंत्री किरोड़ी लाल मीणा कह्यो के बत्ती बिरखा रे कारण साखां ने व्ह्या नुकसाण री भरपाई करी जावेला अर टूटी सडकां सुधारी जावेला। मीणा कह्यो के घणी बिरखा रे कारण ढांढा-ढोरां मांय बीमारी रे कारण दौसा ज़िला रा ठीकरिया गांव मांय कुछ मवेशियां री मौत री खबर मिली है, ज्यीं पाछे पशुपालन विभाग ने पशुआं रे टीका लगावण रा हुकम दिया ज्य है।

राष्ट्रीय बागवानी मिशन रा तैत जोधपुर जिला मांय ढढोरा, मिण्डोली, बिरानी, भोपालगढ़ अर बिराई रा प्रगतिशील किसान सरकारी मदद ऊं पॉली हाउस बणा र खीरा ककड़ी, टमाटर, हरी गोभी अर शिमला मिर्च सरीखी साखां री उपज ले रह्या है। जोधपुर उद्यान खंड रा संयुक्त निदेशक डॉ. जीवन भाकर बतायो के पॉली हाउस शेड नेट ऊं किसान विपरीत परिस्थितियां मांय ई चोखी उपज ले सके है। वे बतायो के नकदी साखां री उपज अर आमदनी बधबा ऊं किसानां रा जीवन स्तर मांय सुधार आ रह्या है।

.....

प्रदेश रा न्यारा-न्यारा हलकां मांय एक-दो दिन रा विराम पाछे बिरखा रो दौर ओजू सरू व्हे ग्यो है। जोधपुर मांय एक सप्ताह पाछे आज चोखो मेह बरस्यो। करौली मांय जिला मुख्यालय अर आरे-सारे रा हलकां मांय व्ह्या मेह पाछे पांचना बंधा रा दो दरूजा खोल र बत्तो पाणी निकाल्यो जा रह्यो है। गंभीर नदी मांय पाणी रा तेज बहाव ने ध्यान राखता थकां प्रशासन जनता ऊं सावचेत रहवण री अपील कीनी है। डूंगरपुर जिला मांय रूक-रूक व्हे रही बिरखा रे कारण मेवाड़ा बांध माथे ई चादर चाल रही है। मौसम विभाग रे मुजब आज कोटा अर उदयपुर संभाग मांय कठे-कठे भारी जद के जयपुर, जोधपुर अर अजमेर संभाग रा कुछ हलकां मांय बादळां री गाज़ सागे बिरखा रा आसार है। महकमा रे मुजब राज्य रा ऊगणी हलका मांय केई ठौड़ां काल ऊं बिरखा मांय बधोतरी व्हेवण री संभावना है।

000

पेरिस मांय चाल रह्या पैरालंपिक खेलां रा तीजा दिन आज ई भारत ने निशानेबाजां ऊं तमगा जीतण री उम्मीद है। महिलावां री दस मीटर एयर राइफल एसएच-1 होड़ रा क्वालीफिकेशन राउंड मांय रूबीना फ्रांसिस चुनौती पेश कर रही है। पुरुषां री दस मीटर एयर राइफल एसएच-1 होड़ रा क्वालिफिकेशन राउंड मांय आज भारत रा महावीर उनहल्केर देश री नुमाइन्दगी करेला। पुरुषां री भाला फैंक होड़ मांय प्रवीण कुमार भारत री चुनौती पेश करेला।

000

हॉकी रा जादूगर मेजर ध्यानचंद रा जन्म दिवस रे मौके 26 अगस्त ने सरू करी ज्यो खेल सप्ताह आज पूरो व्हे ग्यो। सप्ताह रा तैत सवाईमाधोपुर रा जिला खेलकूद प्रशिक्षण केंद्र मांय आज रुमाल झपट्टा अर बैडमिंटन रा मुकाबला राख्यी ज्यो। भरतपुर रा रामेश्वरी देवी कन्या महाविद्यालय मांय ई भांत-भांत री दौड़ सागे सितोलिया, कबड्डी, खो-खो, रस्साकसी, रुमाल झपट्टा अर चम्मच दौड़ री होड़ं राख्यी ज्यी। ई दौरान फिट इंडिया री शपथ ई दिरायी ज्यी अर जीतण वाळी टाबरियां ने ईनाम दिया ज्यो। झालावाड़ मांय वॉलीबॉल, बैडमिंटन, लंगडी टांग, टेबल टेनिस, फुटबॉल, रस्साकसी, हॉकी, खो-खो अर टेनिस बॉल क्रिकेट सरीखी होड़ं राख्यी ज्यी।

000

झालावाड़ मांय कौशल, रोजगार अर उद्यमिता विभाग री ओर ऊं बेरोजगार नौजवानां ने न्यारा-न्यारा हलकां मांय नौकरी देवण सारू आज शिविर लगायी ज्यो। जिला रोजगार अधिकारी अजय व्यास बतायो के शिविर मांय सिरकत करण वाळा करीब 100 बेरोजगार नौजवानां मांय ऊं बत्तीस जणां ने एक गैर सरकारी कंपनी री ओर ऊं नौकरी सारू चुणी ज्यो।

000

सिरोही जिला रा माउंटआबू मांय ब्रह्मकुमारी ईश्वरीय संस्थान री ओर ऊं आज माइंड बॉडी मेडिसिन रा बारा मांय राष्ट्रीय सम्मेलन सरू व्ह्यो। सम्मेलन रो उद्घाटन केंद्रीय मंत्री डॉ वीरेंद्र कुमार कीनो। सम्मेलन मांय देशभर रा करीब 500 डॉक्टर शिरकत कर रह्या है। ई मौके केन्द्रीय मंत्री ईलाज मांय योग अर आध्यात्म रो खास महत्त्व बताता थकां कह्या के चिकित्सा विज्ञान मांय आं रा समायोजन ऊं केई बीमारियां रो ईलाज संभव है।